

08 AUG 1998

Mahathir-modal

MAHATHIR SARAN ORANG KAYA PAJAKKAN BARANG KEMAS

PETALING JAYA, 8 Ogos (Bernama) -- Datuk Seri Dr Mahathir Mohamad hari ini mencadangkan rakyat yang memiliki barang-barang berharga seperti barangan kemas supaya memajakkannya di luar negara bagi membantu menambah modal dalam negara.

"Saya percaya terdapat harta terselindung bernilai berbilion-bilion ringgit di negara," kata Perdana Menteri.

Dr Mahathir berkata cadangan beliau itu tidak bermakna rakyat perlu menderma tetapi hanya memajakkan barangan berharga mereka di luar negara untuk mendapat tunai dan ia hanya bersifat sementara sehingga ekonomi pulih.

"Apabila ekonomi kita pulih, kita boleh bawa balik barang-barang kemas itu dari luar negara," kata beliau ketika merasmikan perhimpunan agung MIC yang ke 52 di sini.

Sambil menekankan beliau hanya membuat cadangan dan bukannya memaksa, Dr Mahathir berkata modal yang diperolehi melalui pajakan itu dapat digunakan untuk membantu usaha mengatasi masalah ekonomi negara.

"Kita mahu menambahkan modal kita. Ini satu cara membantu negara tanpa kerugian pada diri sendiri," katanya.

Dr Mahathir berkata dengan memajak barang-barang kemas mereka dan barangan berharga yang lain, ia akan melambangkan semangat patriotisme tertinggi dalam usaha mengatasi masalah ekonomi.

Perdana Menteri mencetuskan gelak ketawa di kalangan perwakilan apabila berkata beliau melihat ramai dalam dewan itu memakai barang-barang kemas termasuk berlian.

"Saya tidak meminta anda untuk menderma tetapi mentukarnya kepada tunai, bukan menjualnya dan bukan di dalam negara," kata Dr Mahathir.

"Saya cadangkan wanita-wanita patriotik dari semua kaum menggunakan barang-barang kemas mereka untuk mendapatkan tunai dari luar negara," katanya.

Dr Mahathir berkata, kerajaan akan berusaha gigih untuk memastikan ekonomi negara pulih semula dan mereka yang memajak barangan berharga mereka di luar negara akan dapat membawanya balik.

"Kita tidak akan memaksa sesiapa. Saya hanya merayu," kata beliau.

Dr Mahathir berkata, jika rakyat boleh memasukkan lebih banyak wang ke dalam sistem, ia akan membolehkan ahli-ahli perniagaan tempatan meminjam untuk menjalankan perniagaan dan menghidupkan semula ekonomi.

Beliau juga menyentuh mengenai usaha-usaha menjajah semula negara tetapi percaya rakyat akan menentangnya.

"Kita di BN dan rakyat akan menentang sebarang usaha untuk menjajah semula," kata Dr Mahathir.

Mengenai MIC, Dr Mahathir berkata walaupun parti ketiga besar dalam BN tetapi sumbangannya adalah besar berbanding dengan nisbah rakyat keturunan India.

Beliau berharap parti itu akan terus kekal sebagai sebuah pertubuhan politik yang kukuh.

-- BERNAMA

AZ ES PR